


التسبحة

تين أويه إنسوك

🎵 تقدر تسمع اللحن من مكتبة الألحان

لحن تين أويه إنسوك من أجمل ألحان التسبحة ... بيتقال بطرق مختلفة لكن كلامه رائع، و الظروف اللي اتقال فيها اللحن ده أروع



اللحن ده قاله ال 3 فتية القديسين و هم في وسط أتون النار المُحَمَّى 7 أضعاف
و الكتاب المقدس سجّل لنا صلاتهم عشان تكون مصدر تعليم و تعزية لينا ... إزاي نصليّ و إحنا في قلب الضيقة

الربع الأول

نتبعك بكل قلوبنا. ونخافك. ونطلب وجهك. يا الله لا تخزنا

— تتمة دانيال 1 : 41 و 42

كل قلوبنا

مين يقدر يقول الكلام ده أكثر من دانيال و ال 3 فتية القديسين ... اللي من ساعة ما راحوا بابل و هم (وضعوا في قلوبهم)
أن لا يحدوا عن شريعة إلههم ... و اجتازوا ال [تحدي في الغربة](#) لأنهم تبعوا الله من كل قلبهم منقذين الوصية الأولى في
الكتاب المقدس: تحب الرب إلهك من **كل** قلبك

فقال له يسوع: تحب الرب إلهك من كل قلبك، ومن كل نفسك، ومن كل فكرك

— متى 22 : 37

نخافك

طبعاً موقف كان مخيف جداً ... 3 فتية شباب قدام ملك الأرض كلها و بيهدّدهم بالحرق ... لكن الموضوع كان واضح ليهم:
إحنا عندنا خوف مقدس ... خوف ربنا اللي بيقودنا أن نرضيه

ولا تخافوا من الذين يقتلون الجسد ولكن النفس لا يقدرّون أن يقتلوهـا، بل خافوا بالحري من الذي يقدر أن يهلك النفس والجسد كليهما في جهنم.

— متى 10 : 28

🙏 نطلب وجهك

طبعاً ال 3 فتية مش عايزين يثبتوا شجاعتهم إنهم يتحدوا الملك ... بل عايزين يرضوا و يطيعوا ربنا ... و تعبير (نطلب وجهك) ده تعبير رائع، كأنهم عايزين ربنا ينظر ليهم نظرة رضا ... ده يكفيهم زي داود جدّهم

لك قال قلبي: قلت: اطلبوا وجهي. وجهك يارب أطلب
لا تحجب وجهك عني. لا تخيب بسخط عبدك. قد كنت عوني فلا ترفضني ولا تتركني يا إله خلاصي

— مزمو 27 : 8 و 9

😊 لا تخزنا

طبعاً في الأول نفتكر قصدهم (يا رب نجينا عشان مايبقاش منظرنا وحش قدام الملك و الناس) ... لكن الحقيقة هم كلامهم للملك كان واضح: ربنا يقدر ينجينا، لكن حتى لو لم ينجّنا برضه هانفضل متمسّكين بيه المعنى هنا: يا رب تمجّد فينا ... ماتخلّيش إيماننا يضعف ... إحنا واثقين إنك هاتعمل الصالح لينا سواء أنقذتنا أو لا

هوذا يوجد إلهنا الذي نعبده يستطيع أن ينجينا من أتون النار المتقدة، وأن ينقذنا من يدك أيها الملك.
وإلا فليكن معلوما لك أيها الملك، أننا لا نعبد آلهتك ولا نسجد لتمثال الذهب الذي نصبته

— تثمة دانيال 1 : 17 و 18

📖 الرّبع الثاني

بل اصنع معنا: بحسب دعتك. و كثرة رحمتك: يارب أعنا

— تثمة دانيال 1 : 42

🙏 كرحمتك يا رب

طبعاً دي الصلاة اللي كلنا بنطلبها في كل قداس و كل صلاة بالأجبية ... و دي صلاة الكل و أوّلهم القديسين يا رب إحنا خطاة و مانستاهلش ... لكن من أجل اسمك اصنع معنا كرحمتك و ليس كخطايانا

أما أنت يا رب السيد فاصنع معي من أجل اسمك. لأن رحمتك طيبة نجني.

— مزمو 109 : 21

📖 الرّبع الثالث

فلتصعد صلاتنا: أمامك يا سيدنا: مثل محرقات كباش: و عجل سمان

— تتمة دانيال 1 : 40

☁ رائحة سرور

قبلها كان ال 3 فتية يقولوا إن في الوقت ده مافيش نبي ولا قائد ولا محرقة ولا بخور ولا مذبح عشان يقدرّوا يقدّموا ذبيحة فبيطلبوا من الله يقبل ذبيحة أنفسهم و تقدمتهم و طبعاً ربنا قبل منهم ذبيحة تقديم أنفسهم و ذبيحة تسبيحهم ... و صعدت بخوراً طيباً أمامه

لتستقم صلاتي كالبخور قدامك. ليكن رفع يدي كذبيحة مسائية.

— مزمو 141 : 2

و طبعاً ده يفكّرنا بالذبيحة الحقيقية الكفارية ... ربنا يسوع على الصليب

هذا الذي أّصعد ذاته ذبيحة مقبولة علي الصليب عن خلاص جنسنا
فاشتّمه أبوه الصالح وقت المساء علي الجلجثة

— لحن فاي إيطاف إنف

📌 الرّبع الرابع

لا تنس العهد الذي: قطعه مع آباءنا: إبراهيم و اسحق و يعقوب: إسرائيل قديسك

— تتمة دانيال 1 : 34 و 35

✚ الرجاء بالوعد

طبعاً ربنا مش بينسا وعوده ... و وعوده ثابتة من ساعة ما وعد أبونا إبراهيم إن في نسله تتبارك كل أمم الأرض و الوعد ده تحقق في السيد المسيح و حاجة جميلة جداً إن في الضيق و الظروف الصعبة الإنسان يفكّر نفسه بوعود ربنا و الكنيسة من جمال الصلاة دي أخذتها و وضعتها في الألفية في الساعة التاسعة, وقت ما ربنا مات على الصليب

لا تتركنا إلى الانقضاء ولا تسلمنا إلى الدهر, ولا تنقض عهدك ولا تنزع عنا رحمتك, من أجل إبراهيم حبيبك واسحق عبدك وإسرائيل قديسك

— القطعة الثالثة من الساعة التاسعة

📌 الرّبع الخامس

باركوا الرب يا جميع الشعوب: والقبائل و لغات الألسن: سبحوه و مجدوه: و زيدوه علواً الى الأبد

— تتممة دانيال 1 : 51 ل 88

التسبيح

طبيعي بعد ما الإنسان يفتكر وعود الله و رحمته ... ييجي التسبيح بأروع مرحلة: الهوس التالت و الألحان اللي فيه و الهوس ده دعوة لكل المخلوقات من السماء و الأرض و البحر إنها تسبّح ربنا

طبعاً هم لسة جوة الأتون و التجربة لم تنتهي ... لكن نفس الروح اللي موجودة في ال 3 فتية كانت موجودة في بولس و سيلا و هم في سجن فيلبي : تسبيح و شُكر على طول

لكي أباركك كل حين جميع أيام حياتي

— القداس الكيرلسي

الرُّبع السادس

اطلبوا من الرب عنا أبها الثلاثة قديسين سدراك وميساك وأبدناغو ليغفر لنا خطايانا

الشفاعة

طبعاً الشفاعة جزء لا يتجزأ من عقيدتنا الأرثوذكسية

و طلب شفاعة و صلاة الملائكة و القديسين هو رد فعل طبيعي و مشاركة بين الكنيسة المنتصرة و الكنيسة المجاهدة ...
عشان كده في آخر كل لحن بيتكلم عن ملاك أو قديس (بعد ما عرفنا فضائله و كرامته), لازم نطلب شفاعته و صلاته عنا

**ربنا يديّنا نسبّح بالروح و الذهن و القلب ... نفهم عظمة ألحان كنيستنا اللي بتعلّمنا الصلاة في أصعب الظروف
بطريقة بسيطة و رائعة و ألفاظ دقيقة جداً**